

PAGTULON-AN 22 – SI PEDRO MITABOK SA DALAN SA MGA GENTIL

Buhat 10

TEMA: Sa pagpakita sa kalainan ug pagkapareha sa maayong balita ni Pedro ug ni Pablo.

Kon ikaw magatan-aw sa usa ka prutas nga “orange” ug usa ka mangga, pila ba ka mga paagi nga imong mahinganlan diin kining mga prutas nagakalahi? Sa iyang kolor, sa kalami o sa iyang porma ba? Sa unsa ba nga mga paagi sila nagkapareha? Pareho kining lingin, mga prutas ug pareho kining maayo kaonon, ug uban pa. Karon, atong pagatan-awon sa unsa nagkalahi ang maayong balita ni Pedro ug ang maayong balita ni Pablo. Ato usab tan-awon nga kini nagkapareha sa pipila ka mga paagi.


Si Pedro nagapadayon gihapon sa iyang trabaho ingon nga tagdumala sa trapiko sa DALAN SA GINGHARIAN. Siya ilalum sa Kasugoan ug nagadumala lamang ug usa ka matang sa mga tawo ngadto sa Ginghamarian: *ang mga Judio*, Buhat 2:36. Siya ug ang ubang mga apostoles nagapamatuod sa ilang kagahum pinaagi sa mga ilhanan ug mga katingalahan, Buhat 3:1-10, 5:12-16. Apan didto sa Buhat 9:43, atong mabasa nga si Pedro nagpabilin pipila ka mga adlaw sa Jopa didto sa balay ni Simon nga magpapanit. Adunay usa ka tawo didto sa Cesaria nga ginganlan ug Cornelio. Siya usa ka kapitan sa kasundalohan nga gitawag nga Panon nga Italyanhon, masimbahon nga tawo ug mahadlok sa Dios kauban sa iyang pamilya, ug nagahatag daghang limos sa mga Judio ug nagaampo kanunay sa Dios. Ang iyang mga pag-ampo, mga limos misaka ingon nga usa ka handumanan atubangan sa Dios, ug usa ka manolunda sa Dios misulti kang Cornelio sa pagpaadto ug mga tawo sa Jopa aron ipadala si Pedro nga muadto sa iyang balay ug magapatalinghug sa mensahe ni Pedro. Sa wala pa makaabut ang tulo (3) ka mga tawo sa balay ni Simon, si Pedro nakakita ug pananawon diin ang Dios nagapakita kaniya nga dili niya paghinganlan si bisan kinsa nga tawo nga dili balaan ug hugaw. Pagkasunod adlaw, si Pedro mikuyog kanila bisan dili angay sa usa ka Judio nga makighusa sa usa ka langyaw ug sa pagbisita kaniya, Buhat 10:1-33.

Uban ni Cornelio, si Pedro mitabok sa DALAN SA MGA GENTIL. Mibuka si Pedro sa iyang baba ug iyang gipatin-aw sa pagpasabut karon nga ang Dios wala nay pinalabi, apan sa matag nasud ang tawo nga mahadlokon Kaniya ug magabuhat ug matarung Iyang pagadawat. Ug si Pedro miwali sa pulong nga Iyang gipadala sa mga anak sa Israel, ang pakigdait pinaagi kang Jesu-Cristo, kinsa mao ang Ginoo sa tanan; giunsa sa Dios sa pagdihog si Jesus nga taga Nazaret sa Balaang Espiritu uban sa gahum ug giunsa Niya paglakaw sa pagbuhat ug maayo ug nagapang-ayo sa tanan nga gisakit sa demonyo, tungod ang Dios nagauban man Kaniya. Giunsa sa mga Judio pagpatay Kaniya, pinaagi sa paglansang sa krus ug giunsa sa Dios pagbanhaw Kaniya sa ika tulo (3) ka adlaw; giunsa ni Cristo sa pagpakita sa Iyang kaugalingon sa dayag ngadto sa mga pinili ug nagsugo kanila sa

pagmantala sa mga tawo nga Siya magahukom sa mga buhi ug sa mga patay ug nga pinaagi sa Iyang ngalan ang matag-usa nga motoo Kaniya makadawat sa kapasayloan sa mga sala, Buhat 10:37-43.

Samtang si Pedro nagasulti niining mga pulong, ang Balaang Espiritu mikunsad kanilang tanan nga nakadungog sa mensahe. Ang mga magtotoo nga may sirkunsisyon nga mikuyog kang Pedro natingala tungod kay ang gasa sa Balaang Espiritu gikabubo man usab ngadto sa mga Gentil. Kay nakadungog man sila nga nanagsulti sila ug mga dila ug nanagdayeg sa Dios.

Ug unya si Pedro mitubag, “Aduna bay makasalanta sa tubig aron dili kabautismohan sila nga nanagpakadawat sa Espiritu Santo sama kanato?” Ug siya misugo kanila nga magpabautismo sila sa ngalan ni Jesu-Cristo. Si Pedro gigamit sa Dios sa pagtabok sa DALAN SA MGA GENTIL, aron ang ubang mga tinun-an masayud nga ang Dios karon nagatugot na sa pagdala sa maayong balita ngadto sa mga Gentil.



Tinubdan: Sweet Publishing – kini ilustrasyon lamang sa Buhat 10:45

Karon, kita nga nagapuyo sa TUGPAHANAN SA GRASA. Atong mahibaloan nga adunay kalainan sa mga mensahe ni Pedro ug ni Pablo. Ang Dios nagatudlo kanato nga ato

gayud nga ilhon ang mga butang nga nagkalahi, Filipos 1:10. Kita gisultihan sa pagbahinbahin sa husto ang Pulong sa Kamatuoran, 2 Timoteo 2:15.

ANG KALAINAN

1. Si Pedro gipaadto sa balay ni Cornelio tungod kay si Cornelio mahadlok sa Dios ug nagabuhat kon unsa ang matarung, Buhat 10: 2,35. Apan si Pablo gihatagan sa maayong balita sa grasya sa Dios (Buhat 20: 24) tungod kay kita, mga magtotoo kang Cristo, mga makasasala man nga walay paglaum, Roma 3:10-18, 5:8,10.
2. Kadtong nangaluwas pinaagi sa maayong balita ni Pedro nagasulti ug mga dila nga gihatag ingon nga ilhanan sa mga Judio, 1 Corinto 1:22. Apan, si Pablo nagaingon nga ang dila pagahunongon, 1 Corinto 13:8.
3. Si Pedro nagabautismo sa tubig aron maluwas, Marcos 16:15-16. Apan si Pablo miingon, “Si Cristo *wala* magpadala kanako aron sa pagpamautismo,” 1 Corinto 1:17. Daghan ang nagapaningkamot sa pagtabon sa unsay tin-aw nga gipahayag sa maong mga bersikulo. Sama lang daw nga si Pablo nagpasabut niining iyang pahayag nga ang pagwali sa maayong balita mao ang labing importanting butang, ug nga iyang gitugyan sa uban ang mga dili kaayo mahinungdanong butang sama sa pagbautismo sa tubig. Kon si Pablo nagatugyan sa bautismo ngadto sa uban, kini ilalum lamang gihapon sa iyang pagbulot-an nga ang mga tawo kinahanglan bautismohan. Kini nga kamatuoran makita sa Juan 4:12, diin si Jesus naghimo ug nagbautismo ug daghan pang mga tinunan kay ni Juan (bisan dili gayud si Jesus nagbautismo apan ang iyang mga tinun-an). Kon atong masulti nga si Jesus nagpangbautismo bisan ang tinun-an lamang ang nagabuhat, ato usab kini nga masulti nga si Pablo nagabautismo bisan kini nga buhat iyang gitugyan ngadto sa iyang mga kauban. Si Pablo nagabuhat ug daghang mga butang nga may kalabutan sa maayong balita sa gingharian sa Israel. Apan sa nagakadaghan na ang pinadayag mahitungod sa programa sa Lawas ni Cristo, si Pablo mipahayag didto sa Efeso 4:5: “Adunay usa ka Ginoo, usa ka pagtoo, ug USA ka bautismo.” Wala na gayud kay pagduhaduha kon unsa nga bautismo ang gipasabut diha sa Efeso 4:5. Ang 1 Corinto 12:13, nagapahayag sa tin-aw nga kita gibutang sa Lawas ni Cristo pinaagi sa bautismo sa Balaang Espiritu.
4. Si Pedro nagawali sa Kasugoan; apan si Pablo nagawali nga ang mga Gentil dili ilalum sa Kasugoan, apan ilalum sa grasya, Roma 6:14.

ANG PAGKAPAREHA

1. Pareho nga si Pedro ug si Pablo nagawali sa kapasayloan sa sala pinaagi sa pagtoo kang Cristo, Buhat 10:43, Roma 3:22.
2. Pareho nga adunay bulohaton alang sa tibuok kalibutan: Si Pedro alang sa pagtukod sa Gingharian; si Pablo alang sa pagtawag sa langitnong Lawas ni Cristo, Buhat 1:8, 2 Corinto 5:19.

3. Pareho nga nagsaad sa pagbalik ni Cristo: Si Pedro nagatug-an sa pag-anhi ni Cristo sa kalibutan ingon nga Hari; si Pablo nagatug-an sa pag-anhi ni Cristo diha sa kahanginan aron sa pagtigum sa Lawas ngadto sa Iyang kaugalingon, Buhat 3:20, 1 Tesalonica 4:16-17.

Si Pedro nagawali lamang sa mga Judio, hangtud nga ang Dios mipadayag kaniya nga wala nay pinalabi sa mga tawo. Ngadto kang Pablo gihatag aron ipakita ang kamatuoran sa hingpit nga pagbungkag sa tanang kalainan, Efeso 2:14. Karon ang Dios gusto nga kita makakita nga ang tanang tawo sa tanang kolor ug kaliwat, gikinahanglan maluwas dili pinaagi sa mga relihiyosong mga buhat. Ang matag-usa kanila kinahanglan maluwas pinaagi sa kaugalingong pagtoo sa kamatayon, paglubong, ug pagkabanhaw sa ika tulo (3) ka adlaw sa atong Ginoo ug Manluluwas, nga si Jesu-Cristo.

SAG-ULOHON NGA BERSIKULO: “Magkugi ka sa pagpakita sa imong kaugalingon nga nahamut-an sa Dios, usa ka magbubuhat nga walay igakaulaw, mahibalo nga mobahinbahin sa pulong sa kamatuoran.” 2 Timoteo 2:15.

PAGTULON-AN 22 – BULOHATON

Si Pedro nagawali sa maayong balita sa GINGHARIAN, samtang si Pablo gitawag aron sa pagwali sa maayong balita sa GRASYA SA LAWAS NI CRISTO. Ang katuyoan niining pagtulon-an, mao ang pagpakita sa kalainan ug sa pagkapareha niining duha (2) ka mga mensahe. Direksyon: Ibutang ang mga bersikulo nga gihatag ug imong makita ang pagkamahinungdanon sa *hustong pagbahinbahin sa pulong sa kamatuoran*.

KALAINAN

PEDRO

- 1.-2. Gipadala ngadto kang Cornelio tungod kay siya _____
_____. Buhat 10:35
- 3.-4. Kadtong naluwas nagasulti ug _____
Buhat 10:46
- 5.-6. Gibautismohan sa _____
Buhat 10:47

PABLO

- Gipadala ngadto sa mga Gentil tungod _____
_____. Roma 5:8
- Nagaingon nga ang dila _____
1 Corinto 13:8
- Nagaingon nga siya wala ipadala sa _____
_____. 1 Corinto 1:17

PAGKAPAREHA

- 7.-8. Butangi ang mga blangko sa ubos ug imong makita sa unsa nga paagi nagkapareha ang mensahe ni Pedro ug ni Pablo.

Pareho sila nga nagwali sa kapasayloan sa sala pinaagi sa _____ sa Ginoong Jesu-Cristo. Buhat 10:43, Roma 3:22.

Pareho nga adunay bulohaton alang sa _____. Buhat 1:8, 2 Corinto 5:19. Si Pedro alang sa pagtukod sa Ginghamarian; si Pablo alang sa pagtawag sa Lawas ni Cristo.

Pareho nga adunay bulohaton sa _____ ni Cristo, Buhat 3:20, 1 Tesalonica 4:14-17. Si Pedro nagsulti nga si Cristo muanhi ingon nga Hari; si Pablo nagsulti nga si Cristo moanhi ingon nga Ulo aron pagsakgaw sa Lawas ni Cristo.

9. Ikaw usa ka Tinugyanan nga pinadala ni Cristo. Unsaon nimo pagsulti sa mga tawo nga kinahanglan sila maluwas? Isulat ang mga bersikulo nga imong gamiton: _____
_____.

10. Isulat ang 2 Timoteo 2:15. _____

_____.